

## ■ CORPUS CATHOLICUM



L'avat da la claustra dad Uznach Emmanuel Rutz ha referi en il ravugl dal Corpus Catholicum.

FOTO M. HARTMANN

# Nov reglament da salarisar ils catechets

**(anr/gc) La radunanza dal Corpus Catholicum (baselgia catolica dal Grieschun) è vegnida introducida ier a Cuira cun ina oraziun. Las fatschentas statutaricas èn vegnidas liquidadas speditivamain sut il presidi dad Urs Gaupp, Vaz-sut. Il rapport da la cumissiun administrativa – sut il presidi da Placi Berther, Sedrun – è vegnì sancziunà cun engraziar a la executiva per la lavur speditiva e competentia. Il quint da l'onn passà cun 9,2 milliuns francs entradas sera cun in avanzament da 290 000 francs. Tge che succeda cun la reserva da 60 000 francs per l'instituziun Adebar è anc avert pervia d'in recurs pendent. Il preventiv cun entradas da 9,4 milliuns quinta cun in deficit da 107 000 francs.**

### Nov urden da salarisar catechets

A basa d'ina intervenziun da deputà *Luca Tenchio* ha il Corpus Catholicum preschentà in nov reglament pertutgant l'engaschi e la salarisaziun da catechets e catechetas. L'interpellant aveva pretendì che tuts catechets duajan survegnir la medema paga segund la salarisaziun chantunala da scolasts.

Suenter ina lunga discussiun e pliras midadas è il nov reglament vegnì sancziunà cun 69:8 vuschs.

### Schlià si la cumissiun da religiun

Cun 79:0 vuschs è il reglament da 1984 da la cumissiun per instrucziun religiusa vegnì abrogà.

### Elecziun dals delegads

La revisiun parziala da l'urden davart l'elecziun dals delegads da las plaivs da l'onn 1984 è vegnida sancziunada cun 81:0 vuschs.

### «Jau ed il maletg da Dieu»

Igl è usità ch'i dat in referat en connex cun la radunanza dal Corpus Catholicum. Uonn ha l'avat dals benedictinmissiunaris dad Uznach, *Emmanuel Rutz* (il successur da l'investg auxiliar *Marian Eleganti* da la diocesa da Cuira), discurrì davart «Jau ed il maletg da Dieu».

Accentuà è vegnì che quel maletg da Dieu stoppia esser simpatic. Mussà concretamain ha il referent quai tras citats or dal Veder e Nov Testament. Era ha el declarà co quai Dieu da carezia possia sa mussar en noss dis.